



# NORSK LOVTIDEND

## Avd. II Regionale og lokale forskrifter mv.

Utgitt i henhold til lov 19. juni 1969 nr. 53.

Kunngjort 16. januar 2023 kl. 14.35

PDF-versjon 3. februar 2023

17.11.2022 nr. 2612

### Forskrift om vass- og avløpsgebyr, Ål kommune, Viken

**Heimel:** Fastsett av Ål kommunestyre 17. november 2022 med heimel i lov 16. mars 2012 nr. 12 om kommunale vass- og avløpsanlegg (vass- og avløpsanleggslova) § 3 og forskrift 1. juni 2004 nr. 931 om begrensning av forurensning (forurensningsforskriften) § 16-1 andre ledd.

### Kapittel 1. Generelle føresegner

#### § 1-1. *Føremålet med forskrifta*

Forskrifta fastset utrekningsmåte og gebyrplikt for kommunen sine vass- og avløpstenester.

#### § 1-2. *Definisjonar*

I denne forskrifta meinast med:

- a. *Eigedom:* Fast eigedom registrert med eige gards- og bruksnummer, eige festenummer eller eige seksjonsnummer i matrikkelen. Seksjon etablert i høve til lovgivinga om eigarseksjonar vert rekna som sjølvstendig eigedom.
- b. *Abonnt:* Eigar eller festar av eigedom som er tilknytt kommunen sitt vass- og/eller avløpsanlegg, eller som er godkjend eller kravd tilknytt. Festar av eigedom skal stå som abonnt når gjenstående festetid da gebyrplikta oppstod var 30 år eller meir, eller festar har rett til å få festeavtalen forlenga slik at samla festetid frå gebyrplikta oppstod vil kunne bli 30 år eller meir. I burettslag er burettslaget abonnt. I eigarseksjonssameige er kvar eigarseksjon ein abonnt.
- c. *Abonnement:* Avtale mellom abonnt og kommunen om vassforsynings- og/eller avløpstenester gjennom tilknytning av sanitærinstallasjonar og private vass- og avløpsanlegg til kommunen sine vass- og avløpsanlegg. Abonnementet følgjer standard abonnementsvilkår, og det er ikkje ein føresetnad at det vert inngått ei særskilt skriftleg avtale med kvar abonnt. Avtale om tilknytning via privat fellesledning vert rekna som abonnement.
- d. *Sanitærinstallasjonar:* Abonnenteigde røyr, installasjonar og utstyr innanfor husets yttervegg, som er tilknytt vass- og/eller avløpsanlegg.
- e. *Privat vass- og avløpsanlegg:* Abonnenteigde private ledningar (stikkledningar) og utstyr utanfor husets yttervegg, som er tilknytt offentleg vass- og/eller avløpsanlegg.
- f. *Avløpsvatn:* Både sanitært og industrielt spillvatn og overvatn.
- g. *Bygg/bygning:* Konstruksjon/byggverk med eige bygningsnummer i matrikkelen.
- h. *Brukseining:* Bygning eller del av bygning (lokale), til dømes bustad, kontor, verkstad og lager.

- i. *Bueining*: Brukseining som er definert som bustad eller bueining i matrikkelen. Som bueining reknast kvar og ei brukseining som har minst eitt rom og eigen inngang, og der ein har tilgjenge til vatn og toalett utan å gå gjennom anna brukseining.
  - 1. *Utleigerom i ein privat bustad*: Det som på folkemunne ofte blir omtala som hybel eller utleigerom reknast ikkje som sjølvstendig bustad, sidan ein må gå gjennom andre sin bustad for å komme til eige rom.
  - 2. *Hyblar i hybelbygg*: Kvar hybel reknast som sjølvstendig bustad, sjølv om bebuarane deler viktige funksjonar som kjøkken og/eller bad. Kjøkken, bad og gang som delast av fleire bebuarar reknast som fellesareal og ikkje sin eigen del av andre sin bustad.
- j. *Bustadeigedom*: Eigedom med bygg som vert brukt til bustadføremål, medrekna fritidsbustad. Bygningstype 111–163 etter NS 3457.
  - 1. *Fritidseigedom*: Eigedom der alle bustadbygg er registrert som fritidsbustad i matrikkelen.
  - 2. *Fritidsbustad*: Registrert i matrikkelen med bygningstype 161–163 etter NS 3457.
- k. *Kombinasjonseigedom*: Eigedom med ei eller fleire bueiningar, i tillegg til ei eller fleire brukseiningar som ikkje er bustad. Eigedom med ei eller fleire bueiningar i tillegg til ei eller fleire bygningar for fiskeri eller landbruk vert klassifisert som kombinasjonseigedom.
  - 1. *Næringseigedom*: Eigedom som ikkje er bustad, fritidsbustad eller kombinasjonsbygg. Bygg for offentlege føremål vert klassifisert som næringsbygg.
- m. *Bruksareal (BRA)*: Bruksareal for eigedom som er registrert i matrikkelen og rekna med utgangspunkt i NS-3940.

### § 1-3. *Generell gebyrplikt*

Plikta til å betale vass- og/eller avløpsgebyr gjeld følgjande abonnentar:

- a. Fast eigedom som er tilknytt kommunal vass- og/eller avløpsleidning, direkte eller gjennom privat samleidning.
- b. Eigedom som kommunen i medhald av plan- og bygningsloven § 27-1 eller § 27-2 har kravd tilknytt kommunal vass- og/eller avløpsleidning.

### § 1-4. *Gebyrtypar*

Gebyrtypane er:

- a. Eingongsgebyr for tilknytning til vatn og avløp.
- b. Årsgebyr for vatn og avløp (summen av fast og variabel del).

I tillegg kan kommunen krevje betaling etter standardiserte satsar for kommunen sine kostnader ved avlesing av vassmålar, samt avstenging og påsetting av vassforsyning.

### § 1-5. *Gebyrsatsar*

Gebyrsatsane vert årleg vedteke av kommunestyret, og trer i kraft frå det tidspunktet kommunestyret avgjer. Gebyra skal fullt ut dekkje kommunen sine kostnader ved levering av tenestene regulert av denne forskrifta.

Gebyrsatsane kjem fram av gebyrregulativet, og er tilgjengelege på kommunen sine heimesider.

### **§ 1-6. Arealberekningmetode**

Dersom utrekninga av gebyr vert gjort avhengig av bustaden sin storleik, skal det vere bruksarealet (BRA) rekna etter NS 3940 som dannar grunnlaget for gebyrfastsetjinga.

Seterhus, sel, rorbu, skogs- og utmarkskoie, gamle, frittliggjande garasjar, uthus, anneks, utvendige buer og naust vert ikkje medrekna som bruksareal for bustad- og kombinasjonseigedom. Bygningstypar 171–172 og 181–183 etter NS 3457.

Frå dato denne forskrifta trer i kraft og fram til 1. januar 2024 vert ikkje hus for dyr, landbrukslager, silo og andre landbruksbygningar medrekna som bruksareal for bustad- og kombinasjonseigedom. Bygningstypar 241 og 249 etter NS 3457.

Dersom eigedomen sine opplysningar i matrikkelen er mangelfulle, kan kommunen estimere arealet basert på gjennomsnittsoverslag basert på bygningstype. Abonnten kan sjølv skaffe dokumentasjon på eigedomen sitt gebyrpliktige areal.

Som grunnlag for utrekning av gebyr tar kommunen utgangspunkt i opplysningane i matrikkelen. Opplysningar skal korrigerast dersom dei er feilaktige.

## **Kapittel 2. Tilknytingsgebyr**

### **§ 2-1. Gebyrplikt**

Gebyr for tilknytning til kommunalt vass- og/eller avløpsanlegg skal betalast for:

- a. Tilknytning av eigedom.
- b. Tilknytning av eigedom som kommunen krev tilknytt.
- c. Eigedom med tilknytning som ikkje er godkjent.

Tilknytingsgebyr for tilknytning til vatn og/eller avløp skal ikkje betalast for:

- a. Seksjonering av allereie tilknytt eigedom.
- b. Bygg som har mellombels tilknytning i opptil tre år, til dømes brakkerigg. Dersom tilknytninga varer i meir enn tre år, skal det verte kravd tilknytingsgebyr.
- c. Særskild tilknytning av sprinklaranlegg.
- d. Tiltak som utvidar eigedomen sitt gebyrpliktige bruksareal etter § 1-6.

### **§ 2-2. Utforming av gebyra**

Tilknytingsgebyret er eit eingongsgebyr og vert betalt etter fastsette kategoriar i gebyrregulativet.

Om kommunen overtek private vass- og/eller avløpsanlegg kan kommunen fastsette særskilt sats i det enkelte tilfelle.

For bustadar skal eingongsgebyret for tilknytning utgjere eit fast beløp per bueining.

For nærings- og kombinasjonseigedom skal eingongsgebyret for tilknytning utgjere eit fast beløp per eigedom som er tilknytt.

### **§ 2-3. Ansvar og betaling**

Den som er abonnent på det tidspunktet gebyrplikta oppstår, er ansvarleg for betaling av gebyret.

Gebyret vert fakturert etter gjeldande sats når igangsetjingsløyvet vert gjeve. For eksisterande bygg med tilknytning som ikkje er godkjend, vert tilknytingsgebyr betalt etter gjeldande sats på det tidspunktet kravet vert framsett eller foreldingsfristen sitt utgangspunkt, jamfør foreldelsesloven § 3.

Tilknytingsgebyr skal vere betalt før tilknytning.

## **Kapittel 3. Årsgebyr**

### **§ 3-1. Gebyrplikt**

Årsgebyr skal betalast for alle eigedomar som:

- a. er tilknytt kommunalt vass- eller avløpsanlegg, eller
- b. er gebyrpliktig etter § 1-3 første ledd bokstav b.

Årsgebyr reknast frå den tidlegaste av dato for mellombels bruksløyve eller dato da eigedomen blei tatt i bruk i tilfelle der mellombels bruksløyve ikkje er gitt. For mellombels tilknytningar blir årsgebyr rekna frå dato for tilknytning til dato når tilknytningen blir avslutta.

Gebyrplikta er uavhengig av om det er utandørs tappepunkt/vasspost eller om det er innlagt vatn.

### **§ 3-2. Gebyret sin oppbygning**

Årsgebyra for vass- og avløpstenester er samansett av to delar:

- a. Abonnementsgebyr (fast del).
- b. Forbruksgebyr (variabel del).

Inntektene frå abonnementsgebyret skal fortrinnsvis dekkje vass- og avløpstenesta sine forventade kapitalkostnader.

Kor stor del av årsgebyret som skal vere fast og variabel del, vert kvart år fastsett i gebyrregulativet.

### **§ 3-3. Abonnementsgebyr**

Bustadeigedom skal betale abonnementsgebyr som ein fast sats per bueining. Eigedom med hybel eller sokkelleilegheit betaler ikkje abonnementsgebyr for første bueining som er hybel eller sokkelleilegheit.

Fritidseigedom skal betale abonnementsgebyr etter fastsett sats per bueining i gebyrregulativet.

Eigarseksjonssameige med felles vassmålar i bygning kor det både er bueiningar og brukseiningar med næringsverksemd skal betale abonnementsgebyr som ein fast sats per brukseining.

Nærings- og kombinasjonseigedom skal betale abonnementsgebyr etter fastsette kategoriar som speglar vassforsyningskapasiteten til den einskilde eigedom. Kategoriane kjem fram av gebyrregulativet. For sprinklaranlegg gjeld egne satsar.

### **§ 3-4. Forbruksgebyr**

Abonentane skal betale forbruksgebyr etter målt eller stipulert vassforbruk i m<sup>3</sup>. Både kommunen og abonenten kan krevje at forbruksgebyret vert fastsett ut frå målt forbruk. Dersom forbruksgebyret allereie er fastsett ut frå målt forbruk kan dette ikkje reverserast slik at forbruket blir rekna ut etter stipulert vassforbruk.

Det vert ikkje gjeve nedsett forbruksgebyr for storforbrukarar av vatn.

Vassforbruk til sprinklaranlegg er ikkje gebyrpliktig.

Ikkje utbygd eigedom som ikkje er tilknytt skal ikkje betale forbruksgebyr.

Som hovudregel gjeld at avløpsmengda vert rekna lik vassmengda ved utrekning av forbruksgebyr. Unntak frå dette er nemnt i § 3-7, sjette ledd.

### **§ 3-5. Betaling etter målt forbruk**

Forbruksgebyr skal betalast for rapportert årsforbruk. Følgande eigedomar skal betale etter målt forbruk og ha vassmålar installert:

- a. Næringseigedom, medrekna bygg for offentlege føremål.
- b. Kombinasjonseigedom, medrekna eigedomar med ei eller fleire bueiningar i tillegg til ei eller fleire bygningar for fiskeri eller landbruk.
- c. Anlegg med varig eller mellombels tilknytning i samband med oppføring av bygg eller anlegg. Dette gjeld også for anlegg på ein ikkje utbygd eigedom som kunne vore kravd tilknytt etter plan- og bygningsloven § 27-1 eller § 27-2 dersom den hadde vore utbygd.

Dersom det ikkje er mogleg å installere vassmålar kan kommunen fastsetje eit stipulert forbruk.

For mellombelse tilknytningar kan kravet om vassmålar fråvikast dersom vassmengda kan verte fastsett på andre måtar.

### **§ 3-6. Betaling etter stipulert forbruk**

Bueining som ikkje har vassmålar, skal betale forbruksgebyr etter stipulert forbruk.

Stipulert forbruk reknast ut frå bueinga sitt bruksareal slik:

Hytte er sett til eit forbruk på 50 m<sup>3</sup>.

Bueining inntil 35 m<sup>2</sup> er sett til eit forbruk på 50 m<sup>3</sup>.

Bueining 35 til 80 m<sup>2</sup> er sett til eit forbruk på 80 m<sup>3</sup>.

Bueining over 80 m<sup>2</sup> er sett til eit forbruk på 150 m<sup>3</sup>.

### **§ 3-7. Reduksjon av eller tillegg til årsgebyr**

Restriksjonar på vassforbruket, avbrot i vassleveransen eller i mottak av avløpsvatn gjev ikkje grunnlag for reduksjon av gebyra.

Eigedom som står ubrukt eller fråflytta i meir enn eit år kan søke om berre å betale fastledd. Er bustad/bygg på eigedomen fjerna, eller øydelagd slik at den ikkje kan verte brukt, betalast berre fastledd inntil stikkleidning er fråkopla (plugga) ved hovudleidninga. § 3-7 andre ledd første punktum gjeld ikkje fritidsbustadar.

Ved fråflytting grunna flytting til eldreheim og liknande, kan det søkjast særskilt om reduksjon av gebyra til kommunen.

Ved søknad til kommunen kan abonnenten få fritak for årsgebyret når eigedomen fysisk vert fråkopla kommunalt leidningsnett. Det er kommunen som skal stå for fråkoplinga og abonnementet tek slutt når plombering er utført.

Ny tilknytning av eigedomen utløyser ikkje ny betaling av eingongsgebyr for tilknytning. Både arbeidet med å kople frå og ny tilknytning vert utført for abonnenten sin kostnad og etter kommunen si tilvising. Om kommunen utførar stenging eller påsetjing av vassforsyninga vil kommunen krevja betaling etter standardisert sats til dekning av kommunen sine kostnader. Satsen kjem fram av gebyrregulativet.

For eigedom som ikkje vert brukt som bustad, og der avløpsmengda er vesentleg større eller mindre enn vassforbruket, kan avløpsgebyret verte rekna ut frå målt avløpsmengd, eller verte fastsett etter særskild avtale med kommunen.

For eigedom der avløpsvatnet si samansetjing avvik frå vanleg hushaldsavløp og verkar fordyrande på drift og vedlikehald av kommunen sitt avløpsanlegg, kan kommunen fastsetje eit tillegg til avløpsgebyret til dekning av meirkostnadane. I slike tilfelle vert det inngått ein separat avtale mellom kommunen og abonnenten.

### **§ 3-8. Gebyrreduksjon i medhald av forbrukerkjøpsloven sine reglar om prisavslag**

Abbonnten har rett til reduksjon i gebyr (prisavslag) ved feil eller mangel ved vassforsyninga i medhald av forbrukerkjøpsloven sine reglar om prisavslag. Abonnenten har rett til redusert forbruksgebyr dersom ikkje-varsla avbrot i vassforsyninga varer i meir enn 24 timar.

Vilkår for gebyrreduksjon er at mangelen er skulda forhold på kommunen si side, til dømes forureining i vasskjelde eller feil ved kommunalt anlegg. Kommunen pliktar å bidra til å avklare ansvarsforholdet.

Generell tilråding om koking som tryggleikstiltak etter trykkfall som følgje av reparasjon, spyling, brannsløkking mv., gjev ikkje gebyrreduksjon.

Krav om redusert gebyr må verte fremja innan to månader etter at forholdet oppstod, dersom ikkje kommunen har fatta eige vedtak om gebyrreduksjon.

Sats for gebyrreduksjon vert fastsett i gebyrregulativet.

### **§ 3-9. Pålegg om utbetring**

Kommunen kan krevje dekt alle kostnadar direkte knytt til tiltak som følgje av at abonnent har unnlate å etterkome pålegg om å utbetre lekkasjar på eigedomen si vassleidning eller manglar ved avløpsanlegg eller sanitærutstyr. Ved omlegging eller utbetring av avløpsleidningar kan kommunen krevje at eigar av tilknytt stikkleidning set i verk tilsvarende omlegging eller utbetring.

Gebyrpliktig som unnlet å etterkome pålegg om utbetring av lekkasjar som medfører forureining kan verte kravd tvangsmulkt etter forurensningsloven § 73.

### **§ 3-10. Ansvar for opplysingar om abonnement**

Abbonnten skal melde frå til kommunen om endringar i abonnementsforholdet. Eventuelle feil som oppstår som følgje av at abonnenten forsømer denne plikten blir løyst i tråd med § 3-11 og § 3-12.

### **§ 3-11. Ansvar for gebyra**

Abbonnten har ansvar for betaling av årsgebyret, uansett om gebyrkravet er retta mot abonnenten eller annan rekningsmottakar.

Abbonntar som samarbeider om felles vass- eller avløpsmålar, er solidarisk ansvarlege for gebyra. Gjeld slikt samarbeid eit sameige etter eierseksjonsloven, er kvar abonnent ansvarleg for ein del av gebyret i samsvar med sin eigarpart, dersom ikkje anna fordeling er fastsett i sameiget sine vedtekter eller bindande vedtak i sameiget.

Det er etter avtale med kommunen høve til fellesfakturering av eigedomar med fleire bu- eller brukseiningar, til dømes seksjonerte leilegheiter.

### **§ 3-12. Retting av feil gebyrbereking**

Har mangelfulle eller feil opplysingar ført til feilaktig utrekning av gebyr, skal utrekninga rettast og differansen verte gjort opp. Krav som er forelda etter reglane om forelding av fordringar, vert normalt ikkje dekt. Krav vert normalt forelda etter tre år, jamfør foreldelsesloven § 2.

## **Kapittel 4. Føresegner for installasjon og bruk av vassmålar**

### **§ 4-1. Målarartypar**

Føresegnene for vassmålarar gjeld tilsvarande for eventuelle avløpsmålarar. Føresegnene gjeld for vass- og avløpsmålarar med fjernavlesing så langt dei passar.

### **§ 4-2. Installasjon**

Kommunen avgjer kor mange vassmålarar den einskilde eigedom skal ha, og dessutan type, storleik og plassering på vassmålaren.

Kommunen skal godkjenne den som skal stå for installasjon og vedlikehald, og dessutan eventuell flytting, utskifting eller fjerning av målaren.

Dersom eksisterande eigedom med vassmålar vert oppdelt i nye eigedomar, skal kvar av de nye eigedomane ha eigen vassmålar.

Abonnetar kan samarbeide om felles vassmålar der det vil vere særleg kostbart å installere eigen målar for kvar eining. Årsgebyr vert fordelt på abonnentane etter reglane i § 3-11 andre ledd.

Pålagt vassmålar for ny eigedom skal vere installert seinast når det vert gjeve mellombels bruksløyve eller eigedomen vert teke i bruk, og for eksisterande eigedom når den vert tilknytt. Dersom dette vert unnlate, skal abonnenten betale stipulert årsgebyr etter § 3-6.

For installasjon og bruk av vassmålar gjeld elles kommunen sine tekniske føresegner.

### **§ 4-3. Eigarforhold og kostnadar**

Ved installasjon av ny vassmålar skal kommunen stå som eigar av denne. Installasjonskostnadar vert dekt av abonnenten. For anskaffing og vedlikehald av vassmålaren vert det betalt ei årleg leige. Pris for leige av vassmålar kjem fram av gebyrregulativet. Dersom ein vassmålar vert borte eller skadd, skal abonnenten omgåande melde dette til kommunen. Kommunen tek atterhald om retten til å krevje full erstatning for tap eller skade.

### **§ 4-4. Avlesing av vassmålar**

Abonnten skal lese av vassmålaren så nær fastsett tidspunkt for avrekning som mogleg og sende resultatet til kommunen innan fastsett frist. Tidspunkt for avlesing vert fastsett i gebyrregulativet.

Unnlèt abonnenten å lese av vassmålaren kan kommunen etter purring fastsetje årsgebyret etter skjøn. Dersom abonnenten unnlèt å foreta avlesing kan kommunen sjølv setje i verk avlesing utan ytterlegare varsel til abonnenten og krevje særskild gebyr (frammøtegebyr) for å dekkje kommunens kostnadar med dette. Satsen for betaling kjem fram av gebyrregulativet.

§ 4-4, første og andre ledd gjeld ikkje abonnentar med fjernavlesing av vassmålar.

### **§ 4-5. Tilsyn og vedlikehald**

Abonnten skal halde vassmålaren lett tilgjengeleg for avlesing, tilsyn og vedlikehald.

Abonnten skal føre tilsyn med vassmålaren. Abonnten er også ansvarleg for å følgje med på forbruksutviklinga, slik at lekkasjar eller feil vert oppdaga snarast mogleg. Vert ein vassmålar skadd eller går tapt, skal abonnten straks melde frå til kommunen. Broten plombering av vassmålaren vert også rekna som skade.

Kommunen kan føre tilsyn med vassmålaren. Kontrollør frå kommunen skal legitimere seg utan oppmoding.

#### **§ 4-6. Avrekning ved feilmåling**

Dersom vassmålaren ved kontroll viser meir enn 5 % for høgt forbruk, har abonnten krav på tilbakebetaling av for mykje betalt årsgebyr som følgje av feilmålinga. Er plomberinga broten, har abonnten ikkje krav på tilbakebetaling.

Tilbakebetalinga vert rekna frå det tidspunkt ein legg til grunn at feilen må ha oppstått.

Krav som er forelda etter foreldelsesloven, vert ikkje dekt.

Viser vassmålaren meir enn 5 % for lågt forbruk, har kommunen krav på tilleggsbetaling etter tilsvarende reglar.

#### **§ 4-7. Nøyaktigheitskontroll**

Både kommunen og abonnten kan krevje nøyaktigheitskontroll av vassmålaren.

Dersom kontrollresultatet ligg utanfor feilmarginen etter § 4-6, vert det utført ei justering, eventuelt utskifting av vassmålaren, utan utgifter for abonnten. Dersom abonnten har kravd nøyaktigheitskontroll og det ikkje vert påvist feil utanfor feilmargin, vert kostnadane betalt av abonnten.

#### **§ 4-8. Utskifting og flytting**

Er målenøyaktigheita for dårleg, bestemmer kommunen om vassmålaren skal verte justert eller utskifta. Når vanleg levetid for ein vassmålar er nådd, kan kommunen bestemme at vassmålaren heilt eller delvis skal skiftast ut.

Kommunen kan krevje flytting av vassmålar som er plassert i strid med kommunen sine krav til plassering. Abonnten kostar på slik flytting.

## **Kapittel 5. Innbetaling av årsgebyr**

### **§ 5-1. Innbetaling**

Forfalle krav på årsgebyr er sikra med pant i eigedomen etter panteloven § 6-1. Gebyra kan verte kravd inn av kommunen etter reglar for innkrevjing av skatt.

Abonnementsgebyr og forbruksgebyr vert innkravd på felles faktura.

Forbruksgebyret vert betalt à konto basert på rapportert forbruk. Avrekning skjer på 1. termin (faktura) året etter.

Når ein abonnent får installert vassmålar gjeld reglane for stipulert forbruk fram til dato for installasjon av målar forutsett at denne er godkjend av kommunen etter reglane i § 4-2.

Faktura vert sendt til abonnent, eller til annan rekningsmottakar etter avtale.

Eigedomar med felles vassmålar og som har avtalt med kommunen at dei skal fakturerast felles, vert fakturert via ein eigar/festar av eigedomen eller særskild avtalt rekningsmottakar.



Årsgebyra vert kravd inn over eit tal terminar som vert fastsett i gebyrregulativet.

### **§ 5-2. Manglande innbetaling**

Dersom årsgebyret ikkje er betalt innan ein månad etter at den gebyrpliktige har motteke andre gongs varsling om innbetaling, kan kommunen stengje den kommunale vassforsyninga til eigedomen så framt kommunelegen ikkje motset seg avstenginga.

Kommunen kan gje den gebyrpliktige eit gebyr i samband med stenging og påsetjing av vassforsyninga. Gebyret kjem fram av gebyrregulativet.

## **Kapittel 6. Avsluttande bestemningar**

### **§ 6-1. Klage og omgjering**

Det er ikkje høve til å klage på gebyr som er fastsett i kommunen sitt gebyrregulativ, jamfør forvaltningslovens føresegner.

Einskilde vedtak gjort i medhald av denne forskrifta, kan klagast til særskild klagenemnd, jamfør forvaltningsloven § 28 andre ledd.

Gebyr må betalast innan forfallsdato sjølv om gebyrvedtaket er klaga inn.

### **§ 6-2. Ikraftsetjing**

Forskrifta trer i kraft 1. januar 2023.

Frå same tid vert tidlegare forskrifter om vass- og avløpsgebyr i Ål kommune oppheva.